

rum Veteris Testamenti. Ejus viri laudanda sanè est industria, sed Recentiores Scriptores hæc omnia accuratius tractarunt, cum plura & majora in dies ab eo tempore subsidia, ad sacras Antiquitates excutiendas, edita sint, atque studioforum manibus terantur.

MICHAEL AITSINGERUS, Austriacus, Colonia anno MDLXXXII. edidit *Terram Promissionis topographicè, atque historicè descriptam, cum amplissimis duobus locorum ac temporum Indicibus*. Singulari quadam methodo usus est; nec tamen unâ brevi tabellâ, libroque exiguo rem tantam exhaustit, aut eruditus prorsus satisfecit.

Eum diligentia, copiaque rerum, elegantia item & multitudine tabularum, longè post se reliquit CHRISTIANUS ADRIKHOMIUS, Delphus, qui edidit anno MDLXXXIX. *Theatrum Terræ Sanctæ, & Biblicarum Historiarum, cum tabulis Geographicis, ære expressis*. Is cum diu in eo labore insudarit, & aliorum industria, qui ante eum de Judæa scripserant, usum se fateatur, judicat diligentissimum & accuratissimum Terræ Chananæ perlustratorem & descriptorem fuisse *Brochardum*, aut *Burchardum* illum antiquiorem; qui eam ad ventorum rationem exegit, nec voluntate aut facultate rei perficiendæ destitutus fuit. Eum ergo ferè semper sequutus est *Adrichomius*, sed optandum fuisset, quod de plerisque aliis etiam dicendum, *Adrichomium* Hebraicè doctum fuisse, & Scripturæ peritiorem; ab aliis enim, non doctioribus, plerumque pendet, multaque propterea admittit errata, vitiosaque nomina adscribit. Insignia admissorum ejus exempla aliquot protulit *Samson* noster, in Præfatione ad Animadversiones in Tabulas Judææ; nec dissimulare possumus confusionem illam veterum & recentiorum nominum, quæ in ejus tabulis cernuntur, nobis minùs placere. Tabulæ ejuscemodi ad solam Scripturam Sacram intelligendam debent esse comparatæ; aliæ Scriptorum Ethnorum causâ, & infimæ ætatis Historicorum, sunt concinnandæ, si modò tanti sint, ut eorum gratia is labor exantletur. Ad calcem Adrichomiani Operis exstat Catalogus Scriptorum, quibus usus est; ex quibus eos omisimus, quos tantùm MS. habuit, aut qui solam Jerosolymam descripserant; cum priores non existent, nec posteriores ad rem nostram multùm faciant, quippe qui potiùs hodiernam Jerosolymam, quàm veterem, describunt.

Ita tamen placuit ejus labor PHILIPPO BRIETO, Jesuitæ Abbavillæo, *Samsonis* nostri populari, ut, si credimus *Samsoni* (nam opus *Brieti* non vidi) eum exscripserit, nomineque suo præfixo ediderit. Inspiciantur ab iis, quibus libri copia est, *Parallela Geographiæ Veteris & Novæ* Lutetiæ edita anno MDCXLVIII. & quæ de Judæa illic habentur cum *Adrichomio* comparentur.

Post Commentarios in Josuam, Judices & Rutham, edidit Doctissimus Jesuita JACOBUS BONFRERIUS, Lutetiæ anno MDCXXXI. *Onomasticon Urbium & Locorum Sacræ Scripturæ, seu librum de locis Hebræicis ab Eusebio Græcè primum, deinde ab Hieronymo Latine scriptum, in commodiorem ordinem redactum & variis additamentis auctum*. Quo opere nullum melius, atque accuratius, ad universam Geographiam Sacram illustrandam, adhuc editum est; quamvis verba *Eusebii* ac *Hieronymi* ubique non satis emendatè expresse- rit, quod ab editore nupero *Hieronymi* est animadversum; qui & ipse aliorum industriæ hac in re sat amplum spicilegium reliquit. Vide quæ hac de re in *Quæstionibus Hieronymianis*, antè aliquot annos, diximus. Idem etiam *Bonfrerius* elegantem Tabulam Terræ Sanctæ Operi memorato adjecit.

Geneseos Caput X. ubi nomina gentium antiquissima, ita illustravit vir summus SAM. BOCHARTUS, anno MDCXLV. ut omnium Eruditorum puncta tulerit, omnibusque admirationi fuerit, & etiamnum sit; quamvis invidi quidam, nec cum eo ullâ ratione conferendi, scriptis ejus detrahant.

Haud